



**JUDICIAL SYSTEM MONITORING PROGRAMME**  
**PROGRAMA DE MONITORIZAÇÃO DO SISTEMA JUDICIAL**

***Komunikadu Imprensa***

Períodu : Setembru 2010

Edisaun : 02 Outubru 2010

**JSMP Hala'ó Workshop no Fahe Informasaun Konabá Prosesu Lejislativu iha Suku  
Humbœ, Distritu Ermera**

Iha loron 29 Setembru 2010, JSMP hala'ó workshop konabá Prosesu Lejislativu no fahe informasaun konabá atividade Parlamentu Nasionál nian, iha suku Humbœ, Sub Distritu Ermera, Distritu Ermera. Partisipantes ne'ebé tuir workshop no diseminasaun informasaun ne'e hamutuk ema na'in 30. Objetivu husi workshop ne'e, atu aumenta povu iha área rural nia koñesementu konabá prosesu lejislativu, no hatene diak liu tan sira nia representante nia servisu iha uma Fukun Parlaementu Nasionál.

Direitór JSMP Luis de Oliveria Sampaio, hateten katak workshop no diseminasaun informasaun ba área rural, importante tebes atu hala'ó tanbá povu persija hatene, prosesu halo lei nian no servisu husi sira nia representante iha uma fukun Parlamentu Nasionál.

Husi atividade ne'e JSMP nota katak, comunidade sei dúvidas konabá kna'ar husi Parlamentu Nasionál no Governu ninian. Tanbá ne'e, JSMP hanoin katak atividade sira hanesan ne'e bele ajuda hasa'é comunidade sira nia koñesementu konabá prosesu dezemvolvimentu iha area parlamentu no lejislativu nian..

Workshop no diseminasaun informasaun ne'e, hetan entuziasmu maka'as husi comunidade iha área refere, no rezulta rekomendasaun importante balun mak hanesan:

- Komunitade husu atu halo konsultasaun kle'an konabá proposta lei sira ne'ebé importante tebes ba povu nia moris, hanesan esbosu lei "kodigo Sivil";
- Persija aumenta liu tan kapasitasaun ba setór rekursu umanu, atu nune'é ba futuru lei sira bele hakerek rasik husi ema Timór oan, nune'e refleta duni povu Timór Léste nia moris;
- Husu mós ba membrus Parlamentu Nasionál, atu halo fiskalizasaun to'o iha área rural sira, hodi nune'é bele hare diak liu tan povu nia nesesidade báziku iha ne'ebá;

- Husu ba membrus Parlamentu Nasionál sira, bele kria mós dekretu lei ruma atu hasa'é saláriu ba xefi suku no nia ekipa servisu nian.
- Husu ba membrus Parlamentu Nasionál, atu hatudu sira nia ezemplu di'ak ba povu liu husi disiplina oras no hadook aan husi hahalok aat, hanesan hasai lia fuan ne'ebé la diak ba malu iha uma fukun Parlamentu Nasionál nian.
- Husi representante grupu fetu mós husu, atu Grupú Mulheres Parlamentu Nasionál (GMPTL) ba halo mós fisklizaun iha baze bá grupu fetu sira área rural nian.

Asuntu sira ne'e mak nu'udar pontus balun ne'ebé partipantes sira hato'ó iha workshop no diseminaun informasaun iha Suku Humboe, Distritu Ermera nian. JSMP hein katak, husi komunidadade rural nia lian, bele motiva liu tan distintus deputadus sira, atu halo servisu ne'ebé kualidade hodi produs lei ne'ebé refléta duni povu Timór Lésté nia moris.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883